



Rabu, 18 Nopember 2020
Ogen: Matius 19:4-6



Seh Kematen Nirangkensa



Kerina si lit i doni enda erpasang-pasangen. Manusia dilaki ras diberu, suari ras berngi, gelap ras terang, mbiring mbentar, nggeluh ras mate. Emaka sikune kita ngerana sada dampar la banci isilahken dampar sidebanna. Bageka me ibas perjabun, dengen padan perjabun isingetken maka `...` Kata seh Dibata nirangken kita alu kematen jadi sada kalimat kesetian siluar biasa. Kai pe sijadi la terpesirang kegeluhen jabu si enggo ipersada Dibata. Erkiteken enggo ipersadaken Dibata lanai banci isirangken manusia.

Renungenta paksa enda, eme ayat siikutip ibas Pustaka ku liturgi perjabun `emaka lanai bo ia dua , tapi sada. Dage kai si enggo ipersadaken Dibata la banci isirangken manusia`. Kata si ipeseh Jesus enda erkiteken njabab penungkunen kalak Parisi si ersura-sura ncubai Jesus alu penungkunen kerna nirangken ndehara. Ibas jabapen enda teologi perjabun rikutken si isuratken ibas Kitab Kejadin kuga Dibata nepa manusia, dilaki ras diberu, jadi teman, pasangen si cocok. Kenca ia reh teremna, ia nadingken nande bapana guna ersada ras ndehara. Emaka tep-tep khotbah kerna perjabun, kata "seh Dibata nirangkenca alu kematen" tetap ibelasken.

Adi siukur-ukuri, biasana sanga kita ngerana kerna kematen ntah ngalaken kematen, sada hal si tuhu-tuhu jadi kebiaren manusia amin bage gia sanga ngerana kerna kegeluhen perjabun la banci la ibelasken kerna kematen. Bage me renungen enda mpersingeti kita bagi nina kuan-kuan `ija lit perjumpa pasti lit kesirangen`. Kegeluhen perjabun tetap It kesirangen, ntah si ndehara lebe mate maka perbulangen jadi duda ntah si perbulangen lebe mate seh ndehara jadi mbalu. La piga pasangen radu mate duana. Tapi siperlu siinget maka Jesus tetap teman rasa lalap. Ibas kegeluhen IA jadi Tuhanta bagepe doni kematen IA tetap erkuasa.